

# LAOI na LAOITHE

1 Laoi na laoithe do Sholamh.

Ise

<sup>2</sup> Pógadh sé mé de phóga a bhéil  
óir is fearr do ghrá ná fíon.

<sup>3</sup> Is maith é cumhracht d'ola,  
ola dhoirte d'ainm  
a d'fhág na cailíní i ngean leat.

<sup>4</sup> Tarraing i do dhiaidh mé, rithimis.  
Tabhair isteach mé a rí, i do theach féin.  
Tú ár n-áthas, tú ár n-aoibhneas.  
Mórfaimid do ghrá thar fhíon.  
Is ciallmhar iad an mhuintir a thug grá duit.

Ise

<sup>5</sup> Más dubh mé, is sciamhach,  
a mhná Iarúsaileim;



mar bhotha céadair,  
mar bhéalscátha Sholaimh.

<sup>6</sup>Ná féachaigí ar dhath mo chraicinn,  
is amhlaidh a dhóigh an ghrian mé.  
Mo dheartháireacha, a bhí anuas orm,  
d'fhág i bhfeighil na bhfíonghort mé,  
faoi deara faillí m'fhíonghoirt féin.

<sup>7</sup>Inis dom, a ghrá mo chroí,  
Cá gcuireann tú do thréad ar féarach,  
Cá gcuireann chun luí ó bhrothall an lae iad;  
i dtreo nach gcaithfinn gabháil ag cuardach  
trí thréada do chomharsana?

## Mná Iarúsailéim

<sup>8</sup>Murab eol duit, a bhean thar mhná,  
lean lorg na gcaorach;  
cuir do mheannáin ar féarach  
in aice bhoth na dtréadaithe.

## Eisean

<sup>9</sup>Mo chapaill faoi charbad Fhorainn,  
is mar sin liom tú, a chara.



<sup>10</sup> Is breá do ghruanna d'ainneoin fáinní cluas,  
agus do mhúineál d'ainneoin muincí.

<sup>11</sup> Déanfaimid muince óir duit  
agus cnaipí airgid inti.

## Ise

<sup>12</sup> Nuair atá an rí [ag a bhord],  
tá mo nard ag tabhairt a chumhrachta.

<sup>13</sup> Miorr cumhra liom mo ghrá  
i sparán ar mo bhrollach.

<sup>14</sup> Gas coifir liom mo ghrá  
as fíonghort Thobar Gheidí.

## Eisean

<sup>15</sup> Nach álainn tú, a rún,  
nach álainn!  
do shúile is coilme iad.

## Ise

<sup>16</sup> Nach álainn tú, a ghrá;  
is aoibhinn go deimhin.  
I lár dhuilliúr ár leapa.



## Eisean

<sup>17</sup>Crann céadrais díon ár dtí,  
adhmad píne ár dtoscán.

## Ise

**2**Lus an chroimchinn beag ar mhá mé,  
seileastar bocht i ngleann.

## Eisean

<sup>2</sup>Seileastar idir driseacha  
mo rúnsa idir mná.

## Ise

<sup>3</sup>Crann úll thar chrainn na coille  
mo ghrása thar fir.

Faoina scáth suím, mar ba mhian liom;  
milis le mo bhéal a ulla.

<sup>4</sup>Thug sé go teach an fhíona mé;  
grá a mheirge orm.

<sup>5</sup>Nearraigí le cácaí rísín mé;  
Cuirigí brí ionam le húlla,  
Mar tá galar an ghrá orm.



<sup>6</sup> A lámh chlé faoi mo cheann,  
a lámh dheas tharm anall.

## Eisean

<sup>7</sup> Agraím oraibh,  
a mhná Iarúsailéim,  
dar fia agus eilití na má,  
Ná corraigí, ná músclaígí mo rún  
go dtograí sí féin.

## Ise

<sup>8</sup> Éist! mo ghrá!  
Chugainn é  
thar bharr na gcnoc  
ag léim na ngleannta.

<sup>9</sup> Cosúil mo ghrá le heilit  
nó le fia óg ag léim.  
Sin é lasmuigh anois é,  
ag féachaint isteach an fhuinneog,  
Ag faire agus ag glinniúint.



<sup>10</sup> Seo é mo ghrá ag labhairt liom:

## Eisean

Éirigh chugam, a rún;  
a ghile, gluais liom.

<sup>11</sup> Seo anois tá an geimhreadh thart,  
tá an bháisteach glanta feasta,  
<sup>12</sup> tá an tír seo againne faoi bhláth,  
tháinig aimsir scoite na bhfíniúna;  
tá an fearán ag durdáil amuigh,

<sup>13</sup> figí glasa ar an gcrann,  
cumhracht bláth fíniúna ar an ngaoith.

Éirigh chugam, a rún;  
a ghile, gluais liom.

## Eisean

<sup>14</sup> Mo cholm i scailp na haille,  
i bhfolach i bpluaiseanna,  
dá bhfeicfinn do ghnúis,  
dá gcluinfinn do ghuth!  
óir is binn é do ghuth,  
is álainn í do ghnúis.



## Ise

- <sup>15</sup> Beirigí ar na sionnaigh,  
na sionnaigh bheaga dúinn,  
do mhill an fíonghort,  
ár bhfíonghort faoi bhláth.
- <sup>16</sup> Liomsa mo ghrá agus leis-sean mise,  
i measc na mbláthanna chuir sé a thréad,
- <sup>17</sup> Go séide lá  
go scaipe scáth,  
fill ...  
bí cosúil, a ghrá, le heilit,  
nó le hoisín na bhfia  
ar Chnoc [Tairngire].

- 3** Ar mo leaba dom i gcoim oíche  
a loirg mé grá m'anma,  
a loirg mé agus ní bhfuair.
- <sup>2</sup> Éireoidh mé, cuardóidh mé,  
tríd an mbaile, trí na sráideanna,  
lorgfaidh mé grá mo chroí.  
– Má loirg, ní bhfuair.



- <sup>3</sup>Theagmhaigh liom na gardaí  
ar a gcúairteanna tríd an mbaile:  
“An bhfaca sibh grá mo chroí?”
- <sup>4</sup>Ní fada a ghabh mé tharstu  
gur theagmhaigh grá mo chroí liom.  
Rugas greim air nach scaoilfidh mé  
go dtabharfaidh mé isteach é  
i dteach mo mháthar  
i seomra mo bhuime.

## Eisean

- <sup>5</sup>Agraím oraibh,  
a iníona Iarúsailéim,  
dar fia agus eilití na má,  
ná corraigí, ná músclaigí mo rún,  
go dtograí sí féin.
- <sup>6</sup>Cad é seo aníos ón bhfásach,  
mar a bheadh crann deataigh  
as miorr agus túis  
agus uilechumhracht na siopaí?
- <sup>7</sup>Sin é coiste Sholaimh,  
trí fichid laoch thart air,



ó shártaochra Iosrael;

<sup>8</sup> fear claímh gach laoch díobh

ó thaithí an chogaidh;

a chlaíomh ar a shliasaid

i gcoinne bhaol na hoíche.

<sup>9</sup> Do rinne Solamh rí

suí breithimh dó féin

d'adhmaid na Liobáine.

<sup>10</sup> Cosa airgid faoi,

scáth óir os a chionn,

adhairt chorcra ann,

éabann dá fholach.

<sup>11</sup> Tagaigí go bhfeice sibh,

a iníona Iarúsailéim,

Solamh rí gona mhionn rí

a chuir a mháthair air

lá a phósta,

lá áthais a chroí.

## Eisean

**4** Nach álainn tú, a rún,  
nach álainn!



do shúile is coilm iad.  
Laistiar de do chaille  
folt mar thréad gabhar  
anuas Cnoc Ghileád.

<sup>2</sup> D'fhiacra mar thréad lomtha  
aníos as an loch nite,  
cúpla uan ag gach caora  
agus gan caora díobh seasc.

<sup>3</sup> Snáth craorag do bheola,  
do chomhrá ró-aoibhinn.  
Leathbhró ghránúill do ghrua  
laistiar de do chaille.

<sup>4</sup> Túr Dháiví do mhúineál,  
daingean cosanta,  
míle sciath ar crochadh air,  
éide chatha na gcuradh.

<sup>5</sup> Do dhá chíoch mar dhá oisín,  
cúpla aon eilite,  
ag innilt i measc bláthanna.

<sup>6</sup> Go séide lá,  
go scaipe scáth  
rachaidh mé go cnoc an mhirr,



go tulach na túise.

<sup>7</sup> Álainn tú ar fad, a rún;  
atá tú gan cháim.

## Eisean

<sup>8</sup> Tar as an Liobáin, a bhrídeach,  
tar as an Liobáin isteach.  
Féach anuas ó mhullach Amáná,  
ó mhullach Sheinír agus Hearnóm,  
ó fhásach na leon,  
ó shliabh na liopard.

<sup>9</sup> Shaobh tú mo chiall,  
a shiúr, a bhrídeach,  
shaobh tú mo chiall,  
le silleadh ó shúil leat,  
le haon seoid de do chuibhreach brád.

<sup>10</sup> Nach aoibhinn do ghrá,  
a shiúr, a bhrídeach,  
nach blasta do ghrá ná fíon,  
nach cumhra iad do chumhrachtaí  
ná spíosraí an domhain!



<sup>11</sup> Béalín meala, a bhrídeach,  
 mar an criathar ag sileadh;  
 mil agus bainne  
 faoi do theanga go cinnte;  
 boladh cumhra ar d'éadach  
 mar chumhracht na Liobáine.

## Eisean

<sup>12</sup> Gort i lios tú,  
 a shiúr, a bhrídeach,  
 gort i ráth,  
 tobar i gcomhad.

<sup>13</sup> Gránúlla go tiubh ann  
 agus togha gach toraidh  
 ó shruthanna an tobair.

<sup>14</sup> Spiocnard agus cróch ann,  
 giolcach chumhra agus cainéal,  
 gach crann i bhfuil roisín,  
 miorr agus fóifíneach,  
 agus togha gach cumhrachta.

<sup>15</sup> Tobar i ngort  
 aníos as an talamh,  
 nó sruth as an Liobáin.



Ise

<sup>16</sup>Éirigh a ghaoth aduaidh,  
 gluais, a ghaoth aneas,  
 séidigí trí mo ghaireán  
 go leatha a chumhrachtaí.  
 Tagadh mo ghrá isteach ina ghort,  
 blaiseadh sé togha gach toraidh ann.

Eisean

**5**Seo isteach i mo ghort mé,  
 a shiúr liom, a bhrídeach,  
 ag bailiú mo mhirr agus mo bhalsaim,  
 ag ithe mo mheala agus mo chriathair,  
 ag ól m'fhíona agus mo bhainne;  
 ithigí, a chairde, ólaigí,  
 déanaigí meidhir, a chairde cumainn.

Ise

<sup>2</sup>I mo chodladh dom, tá mo chroí ina dhuisseacht;  
 cluinim mo ghrá ag an doras:  
 “Oscail dom, a shiúr, a rún,  
 mo cholúr gan éalang,



óir is báite mo cheann i ndrúcht,  
is fliuch m’fholt ón oíche.”

Ise

<sup>3</sup> Ach, táim tar éis baint díom;  
an gá dom cur orm arís?  
Tá mo chosa nite agam;  
an gcaithim a sailiú arís?”

<sup>4</sup> Shín mo ghrá a lámh isteach  
i bpoll na heochrach;  
chorraigh mo chroí i mo chléibh.

<sup>5</sup> D’éiríos féin  
go n-osclóinn do mo ghrá.  
Bhain miorr fliuch le mo láimh,  
fíormhiorr le mo mhéar,  
ó bhacán an ghlais.

Ise

<sup>6</sup> D’osclaíos do mo ghrá  
– bhí mo ghrá imithe;  
bhain sin an t-anam asam.



Loirg mé é agus ní bhfuair,  
ghlaoigh – níor fhreagair sé.

<sup>7</sup>Theagmhaigh liom na gardaí  
ar a gcuairteanna tríd an mbaile.  
Bhuail siad mé, agus ghoin,  
srac siad díom mo bhrat,  
lucht faire an bhaile.

<sup>8</sup>Achainím oraibh,  
a iníona Iarúsailéim,  
má fhaigheann sibh mo ghrá –  
cad a inseoidh sibh dó uaimse?  
Go bhfuil galar an ghrá orm.

## Mná Iarúsailéim

<sup>9</sup>Cad iad buanna do ghrá-sa,  
a phlúr na mban.  
Cad iad buanna do ghrá-sa  
go n-iarrann tú an achainí sin orainn?

## Ise

<sup>10</sup>Dearg agus bán do mo ghrá;  
d'aithneófá i measc mílte é.



- <sup>11</sup> A cheann mar ór leáite,  
a dhlaioithe mar an phailm,  
chomh dubh leis an bhfiach.
- <sup>12</sup> A shúile mar an colm  
ar bhéal coire uisce  
á ní féin as bainne  
i [gCoire na Mara].
- <sup>13</sup> A ghiall mar spíosraí,  
ceapach luibheanna cumhra.  
A bheola mar bhláthanna,  
ag sileadh mirr chumhra.
- <sup>14</sup> Buinní óir ar a lámha  
go n-iliomad flannchloch.  
A chabhail mar an t-éabann bán,  
agus í breac le saifírí.
- <sup>15</sup> Galláin mharmair a chosa  
ar fhothaí óir ag seasamh.  
Cosúil é leis an Liobáin,  
toga na gcrann céadrais.
- <sup>16</sup> Is é an binneas a fhriotal,  
is mealltacht é uile.



Sin é mo ghrá, sin é mo shearc,  
a iníona Iarúsailéim.

## Mná Iarúsailéim

**6** Cá ndeachaigh do ghrá uait,  
a phlúr na mban,  
cén treo a d'iompaigh do ghrá,  
agus lorgfaimid leat é?

## Ise

<sup>2</sup> Síos ina ghort a chuaigh mo ghrá,  
go ceapacha na spíosraí,  
lena thréad a chur ar féarach  
agus blátha a chruinniú.

<sup>3</sup> Le mo ghrása mise,  
agus liomsa mo ghrá;  
i measc na mbláthanna  
chuir sé a thréad.

## Eisean

<sup>4</sup> Álainn tú, a rún, mar Thirzeá,  
breá mar Iarúsailéim,  
chomh huafar le cathshlua.



<sup>5</sup> Iompaigh uaim do shúile,  
 nó sáróidh tú mé leo.

Folt mar thréad gabhar  
 anuas Cnoc Ghileád.

<sup>6</sup> D'fhiaccla mar thréad caorach  
 aníos as an loch nite,  
 cúpla uan ag gach caora,  
 gan caora díobh seasc.

<sup>7</sup> Leathbhro ghránúill do ghrua  
 laistiar de do chaille.

<sup>8</sup> Trí fichid banríon,  
 ceithre fichid leannán,  
 cailíní gan áireamh –

<sup>9</sup> Ach is túisce liomsa ise,  
 mo cholm gan cháim;  
 is í is túisce lena máthair,  
 is í rogha a buime í.

Ní fhaca cailín í nár thug an chraobh di,  
 banríon nó leannán nár mhol í:

<sup>10</sup> “Cé hí seo chugainn mar fháinne an lae,  
 gealach ar áille,



grian ar loinnir,  
chomh huafar le cathshlua?”

<sup>11</sup> Chuas síos i ngort na gcónna,  
go bhfeicfinn fás an ghleanna  
go bhfeicfinn an raibh an fhíniúin ag eascairt,  
nó an gránúll ag borradh.

<sup>12</sup> Sular thuig mé seo mé, de mhian mo chroí,  
[i gcarbad le taobh] mo phrionsa.

## Mná Iarúsailéim

**7** Fill, fill, a Shiúlamach,  
fill, fill, go bhfeicfidimid thú.

## Eisean

Cad d’fheicfeadh sibh sa tSiúlamach  
ach rince an dá fhoireann?

<sup>2</sup> Nach breá iad do chosa i mbróig,  
a iníon rí;  
lorgaí mar chlocha muince  
dea-dhéanta ó láimh an tsaoir!

<sup>3</sup> D’imleacán mar chuach fíona,  
ní folamh é choíche.



Brú mar charn cruithneachta,  
fál bláthanna air.

<sup>4</sup> Do dhá chích mar dhá oisín,  
cúpla aon eilite.

<sup>5</sup> Do mhuineál mar thúr eabhair,  
do shúile mar locháin Heisbeon  
faoi gheata Bhat Rabaím.

Do shrón mar thúr sa Liobáin  
ag faire i dtreo na Damaisce.

<sup>6</sup> Do cheann mar Chnoc Chairmeil,  
folt ar dhath an chorcra;  
cheangail tú rí lena thriopail.

<sup>7</sup> Is álainn tú, is aoibhinn,  
a shearc, a mhilse.

<sup>8</sup> Ard maorga mar chrann pailme tú,  
do chíocha mar chrobhaing.

<sup>9</sup> “Suas an phailm liom,” arsa mise;  
“béarfaidh mé greim ar a géaga.”

Go raibh do chíocha mar chrobhaing fíniúna,  
boladh úll ar d’anáil.



<sup>10</sup> Togha fíona do phóga  
 ag dul go blasta síos an scornach  
 trí bheola agus fiacla.

Ise

<sup>11</sup> Le mo ghrá-sa mise,  
 agus mise a mhiansan.

<sup>12</sup> Tar liom, a ghrá,  
 amach ar na bánta.

Codlóimid i measc bláthanna coifir.

<sup>13</sup> Moch maidine don fhíonghort,  
 d'fhios ar eascair an fhíniúin,  
 ar oscail a bláthanna,  
 ar bhorr an gránúll.

Is ann a thabharfad grá duit.

<sup>14</sup> Geanúll ag tabhairt a bholadh,  
 togha agus rogha chun ár láimhe.

Sean agus nua  
 a thaisc mé duitse, a ghrá.

8 Cé a thabharfadh go mba deartháir liom thú  
 a dhiúil cíocha mo mháthar,



go bpógfainn thú mar a mbuailfinn leat  
gan náire na ndaoine.

<sup>2</sup> Sheolfainn liom isteach thú  
i dteach mo mháthar a mhúin mé;  
thabharfainn duit fíon cumhra,  
sú mo ghránúll.

<sup>3</sup> A lámh chlé faoi mo cheann,  
A lámh dheas tharm anall.

## Eisean

<sup>4</sup> Agraím oraibh  
a mhná Iarúsailéim  
gan mo rún a chorraí ná a mhúscailt  
go dtograí sí féin.

## Mná Iarúsailéim

<sup>5</sup> Cé hí seo aníos ón bhfásach  
ar ghualainn a grá?

## Eisean

Faoin gcrann úll a mhúscail mé thú;  
is ann a rug do mháthair thú,  
is ann a bhí do bhuime in íona.



<sup>6</sup>Cuir mar shéala ar do bhróllach mé,  
 mar fháinne ar do láimh.  
 Óir ní láidre an bás ná an grá,  
 ní doichte an tÉad na Tír an Bháis.  
 Is tine dhóite é,  
 sárlasair.

<sup>7</sup>Díle uisce  
 ní mhúchfadh an grá,  
 ná tuile abhann  
 ní scuabfadh chun siúil é.  
 An té thairgfeadh a chuid den saol ar ghrá,  
 tarcaisne a gheobhadh sé.

## Dear tháireacha an Chailín

<sup>8</sup>Tá deirfiúr againn atá beag,  
 í fós gan chíochoa.  
 Cad a dhéanfaimid lenár ndeirfiúr  
 an lá a mbeidh sí á hiarraidh?  
<sup>9</sup>Más balla í  
 tógfaimid túr airgid ar a mullach.  
 Más geata í,  
 daingneoidimid le clár céadrais í.



## Ise

<sup>10</sup> Is balla mé  
 agus mo chíocha mar thúir air,  
 Ach leis an bhfear siúd  
 tá mo shíocháin déanta.

## Dear tháireacha

<sup>11</sup> Bhí fíonghort ag Solamh  
 i bpobal líonmhar.  
 Chuir sé an fíonghort ar cíós,  
 míle bonn ón duine ar a thoradh.

## Eisean

<sup>12</sup> Sin é an fíonghort domsa:  
 seo dhuit do mhíle bonn, a Sholaimh,  
 agus dhá chéad thairis dá lucht coimeádta.

<sup>13</sup> Tusa sa ghort  
 – tá na cairde ag éisteacht –  
 cluinim do ghuth.

## Ise

<sup>14</sup> Rith chugam, a ghrá mar eilit,  
 nó mar oisín na bhfia,  
 ar chnoic chumhra.

